



**PRIMEIRO
MINISTRO**

**DISKURSU SUA EXCELÊNCIA PRIMEIRU-MINISTRU
REPÚBLIKA DEMOKRÁTIKA TIMOR-LESTE,
DR. RUI MARIA DE ARAÚJO
IHA OKASIAUN KONFERÉNSIA NASIONÁL
KOMBATENTES LIBERTASAUN NASIONÁL**

**Sentru Konvensoens Díli
Loron 1 fulan Marsu tinan 2016**



Palácio do Governo,
Avenida Presidente Nicolau Lobato,
Dili, Timor-Leste

Eselénsia Sr. Presidente da Republica nudar mos kombatente Veteranu Libertasaun Nasionál

Eselensia Sr. Presidente Parlamentu Nasionál,

Eselensia Sr. Vise-Presidente Parlamentu Nasionál

Eselensia Sras Eis-titulares orgauns soberania

Distintus Deputadus

Membrus do Governu

Chefe Estadu Major Jeneral das Forsas Armadas

Kombatente da Libertasaun Nasionál husi Frente Armada, Klandestina no Diplomátika

Distintus konvidadus

Señoras no señores

Atan hau laos la soi atu hamrik iha ne'e, koalia ba fundadores movimentu libertasaun Nasionál, veteranus kombatentes libertasaun nasional, no kombatentes libertasaun nasional sira hotu, maibe tamba funsaun ne'ebe VI Governu Konstitusional iha atu dudu prosesu implementasaun lei kombatentes nasional sira nian maka atan hau ohin hamrik iha ne'e atu hatoo netik liafuan ruma.

Benvindu ba kombatentes libertasaun nasional sira hotu, no bem vindo especial ida ba maluk sira husi Frente Diplomátika ne'ebe mai husi Australia, Portugal, Inglaterra, Macau no Mocambique – tanba foin ba dahuluk mak ita bo'ot sira partisipa iha sorumutuk ne'ebé halibur kombatente libertasaun nasional sira.

Ho laran haksolok tebes nomos privilejio bo'ot mak ha'u mai iha ne'e nu'udar Xefi VI Governu Konstitusional, hodi loke Konferénsia Nasionál Kombatentes Libertasaun Nasionál nian, Konferénsia ne'ebé governu konvoka atu haktuir rekomendasaun hosi Sua Exelénsia, Sr. Presidente da Republika, ne'ebé husu Governu atu halo konsulta alargada ida ho luta na'in sira hotu kona-ba projetu Dekretu Lei ne'ebé iha objetivu atu define estrutura juridika ba Konsellu Kombatentes Libertasaun Nasionál nian.

Durante loron 3 nia laran, ita bo'ot sira sei halo mós diskusaun klean konaba 'Processo Registo 2003', kona-ba asuntus ho interese nasional no ramata ho selebrasaun loron Nasionál Veteranos no Kombatente da Libertasaun Nasionál. Hau hakarak aproveita oportunidade ida ne'e atu hato'o uluk hau nia agradesimentu spesiál ida ba maun, bin no alin sira, ne'ebé mai hosi Frente Armada, Frente Klandestina no Frente Diplomátika. Biar

simu konvite iha tempu badak ida, ita boot sira halo esforsu mai to'o iha ne'e no nune'e, ha'u fiar katak ita boot sira ida-idak sei fó kontribuisaun maka'as iha sorumotu ida ne'e, nu'udar luta-na'in no testemunha ba kontribuisaun hosi maluk sira seluk, iha ita-nia frente tolu, ne'ebe ha'u temi tiha ona. Ho ita hot-hotu nia esforsu, iha frente tolu ne'e, liu husi meiu ne'ebé de'it, ho kbi'it ki'ik ka bo'ot, nu'udar lider ka militante estrutura rezisténsia nian ka, nu'udar ema ida-idak ho kbi'it no iniciativa rasik, ita fó liman ba malu, iha tempu ida ke naruk no difisil tebetebes, atu ita bele hamriik loron ruma nu'udar nasaun no nu'udar povu ho identidade no kultural rasik.

Tuir mai ita boot sira permite atan hau atu ko'alia liután uit-oan kona-ba kuadru legal ne'ebé fó kbi'it ba Governu Timor-Leste atu apresenta projetu Dekretu-Lei ba Sua Eselensia Prezidente Repúblika, ho objetivu hanesan temi ona iha leten.

Estadu Timor-Leste rekoñese no valoriza ninia luta na'in sira hosi kedas ita-nia lei inan, ita nia Konstituisaun Repúblika Democrática Timor-Leste. Hare'e ba kontribuisaun oin-oin ba libertasaun nasional Timor-Leste nian hosi timor-oan hosi frente tolu ne'ebé temi tiha ona, preámbulu Konstituisaun Timor-Leste nian koa'lia kona-ba frente tolu ne'e. Ita hotu hatene katak kontribuisaun voluntária hosi luta na'in ida-idak ba ita-nia luta libertasaun nasional ne'e, nakonu ho sakrifisiu oin-oin, inkluidu rihun ba rihun mak lakon sira-nia vida no husik ba kotuk faluk no oan-kiak lubuk ida no balun ne'ebe sai deficiente. Artigu 11 Konstituisaun nian garante kedas atu fo protesau ba hotu-hotu ne'ebé partisipa iha rezisténsia hasoru kolonialismu no garante mós protesau ba deficiente sira, ba oan-kiak sira, no ba dependente sira seluk ne'ebé mártir sira husik hela iha ita-nia leet.

Atu haktuir Konstituisaun da Repúblika Democrática Timor-Leste nian kona-ba Kombatentes Libertasaun Nasionál, iha tinan 2006, ita nia Parlamentu Nasionál aprova lei n. 3/2006, ho data 12 Abril, ne'ebé define Estatutu Kombatentes Libertasaun Nasionál nian. Liu husi kuadru legal ne'e, Estadu Timor-Leste fó-sai klean liu oinsá Estadu rekoñese no valoriza Kombatentes Libertasaun Nasionál, oinsá fó protesau sosiál ka sósio-ekonomika ba Kombatentes Libertasaun Nasionál, no oinsá rai-metin no fó onra ba memória rezisténsia nian. Estatutu ne'ebe prevé mós Konsellu Konsultivu ida, nu'udar órgaun konsulta ba Governu, hari'i ho Kombatentes entre nain 7 ka nain 15. Tuir Lei ne'e, Sr. Primeiru Ministru mak nomeia Kombatentes sira ne'e atu Governu rona sira-nia opiniaun kona-ba lei ne'e no mós ba asuntu sira seluk ne'ebé iha relasaun ho Kombatentes Libertasaun Nasionál. Maibé, iha tinan 2011, Parlamentu Nasionál tetu hikas fali lei ne'e no halo alterasaun balun. Liu husi lei n. 2/2011, ho data 23 Marsu, artigu 35 estabelese órgaun foun ida ho naran KONSELLU COMBATENTE LIBERTASAUN NASIONAL, nu'udar órgaun ida ho knaar boot rua:

1- Konsellu Kombatente Libertasaun Nasionál sai nu'udar órgaun úniku ne'ebé representa interesses Kombatentes Libertasaun Nasionál hotu-hotu nian

2- Konsellu Kombatente Libertasaun Nasionál sai nu'udar órgaun konsulta Governu nian.

Lei n. 2/2011 fó kbi'it ba Governu Timor-Leste atu define Konsellu ida ne'e ninia estrutura jurídika liu husi Dekretu-Lei ida, hafoin konsulta ne'ebé hala'o tiha ho organizasaun kombatente libertasaun nasionál 22 iha tinan 2011, iha fulan Abril 2016, VI Governu hato'o Dekretu Lei ba Sua Exelénsia Prezidente Repúblika, hafoin halo tiha mos tan konsulta ho representantes Veteranus no Kombatentes libertasaun nasionál balun. Maibé Sua Exelénsia Prezidente Repúblika haruka fila fali projetu dekretu lei ne'e no husu ba governu atu halo konsulta alargada ho Kombatentes Libertasaun Nasionál sira.

Hare'e ba loron 3 Marsu, nu'udar loron ne'ebé konsagradu ona iha projetu Decretu-Lei, ba loron veteranus no kombatente libertasaun nasionál sira nian, governu decide konvoka kombatentes hosi frente tolu ne'e, atu ita selebra hamutuk loron ne'e, liu husi Konferensia Nasionál ida ne'e, hodi hamutuk, ita hare'e órgaun hira mak ita presiza hari'i atu forma Konsellu Kombatentes Libertasaun Nasionál, ema na'in hira mak sei halo parte orgaun ida-idak, knaar espesifiku saída mak orgaun ida-idak sei iha. Ita sei hare'e mós oinsá halo eleisaun ba membrus ba órgaun ida-idak, se-sé mak bele kandidata, oinsá orgaun sira ne'e foti desisaun, oinsá orgaun oin-oin sira liga ba malu no ho Governu, atu Konsellu ne'e bele kumpre ninia knaar tuir lei n. 2/2011. Importante hare'e mos iha Konferénsia ida ne'e orgaun ida ne'e ninia relasaun, nu'udar orgaun representativu uniku representativu, tuir lei haruka, ho organizasaun veteranus no kombatentes libertasaun sira seluk ne'ebe harii horiuluk no sei funsiona to'o ohin loron.

Tanba Konferénsia ida ne'e sei remata iha loron homenajem ba veteranus sira, Governu Timor-Leste hein katak Konferénsia ne'e sei hala'o ho kalma, no fiar ba malu, katak ita bele hare'e hamutuk estrutura ida ne'ebé mak di'ak liu, no reflekte hotu-hotu ninia hakarak. Keta partisipante ruma hanoin estrutura ruma la hanesan ho Governu nian karik, Ita-Boot sira hanoin katak presiza hadi'a buat ruma iha artigu 35 hosi Lei n. 2/2011 atu haktuir realidade ohin loron, favór hato'o hanoin foun durante diskusaun ne'ebé ita sei organiza durante loron tolu nia laran. Lihosi sorumotu ida ne'e, Governu nakloke atu rekolla idéia hot-hotu, no sei hadi'a projetu Dekretu lei ne'ebe Komisaun Organizadora hato'o ona ba ita boot sira ida-idak.

Molok atu remata, hakarak hodi Governu nia naran dala ida tan agradese Kombatente Libertasaun Nasionál hot-hotu, li-liu Kombatentes Fundadores Movimentu Libertasaun Nasionál, Kombatentes Veteranus ho mós Martires da Libertasaun Nasionál ninia maluk sira ne'ebe partisipa mos iha ne'e, ita hein katak ho Konferénsia nasionál ida ne'e, ita bele servisu diak liu tan, mobiliza liu tan potencialidade hotu ne'ebe kombatentes da libertasaun nasionál nian iha hodi kontribui ba dezvoltamentu nasionál.

Hau deseja ba ita boot sira hotu ne'ebé marka prezensa iha ne'e, susesu bo'ot ba Konferénsia Nasionál ida ne'e.

Ho ida ne'e hau deklara Konferénsia Nasionál Kombatentes Libertasaun Nasionál ninian abertu ba ita hotu.

Loron 1 fulan Marsu tinan 2016
Dr. Rui Maria de Araújo